

四庫全書

史部

欽定四庫全書

史部

皇清開國方略卷二十四

內閣中書臣沈鵬覆勘

總校官原任侍講臣王燕緒

欽定四庫全書

皇清開國方略卷二十四

太宗文皇帝

崇德二年丁丑三月至十二月

崇德二年三月甲辰朝鮮國臣洪翼漢等伏誅

先是朝鮮國王李倬屢上書乞降

太宗諭令縛送首謀敗盟三四臣當正國法以儆後人李

倬奏言首倡浮議之臺諫洪翼漢當大軍到境時

用為平壤庶尹督令即日前進或為前軍所獲或

從間道赴任俱未可知今將附和之宏文館校理尹集修撰吳達濟送詣軍前以俟處分嗣復遣官解送洪翼漢至

盛京至是斬洪翼漢尹集吳達濟於市以正其倡議袒明敗盟構兵之罪

戊午停蓋州城工

蓋州守將李思忠奏言臣奉

命管理蓋州其城垣俱係舊築現在土牆不堅者八十三

夫破裂者三十丈未破裂而不堅者五十三丈前據工部咨稱已盡調丁夫赴遼陽各城脩築蓋州城工可令滿漢蒙古餘丁自燒灰甃砌查蓋州地處邊陲軍士傾緝逃亡脩浚牆濠巡守魚鹽二場夜復登城巡視防守靡寧餘丁僅堪耕種若令燒甃供役恐失農業臣等仰懇

皇上恩准先將破裂處拆毀暫用土築並請寬限三年俟各城歲工再集丁夫造甃脩砌庶城垣可以永固

而耕種不致失時得

旨暫停今年工作餘照議脩築

夏四月辛卯

諭羣臣貸粟貧民及時播種

太宗諭曰今歲告饑凡積粟之家宜與各牛錄內困乏者
賣則取值借則取息如此有無相通則民氣自裕若私
自理藏以致朽爛非我國之人也至貧民無力耕種坐
使土地荒蕪食何由賴該管章京宜時加體察令有力

者助之

丁酉添設八旗議政大臣

太宗命貝子尼堪洛託博洛等與議國政每旗各設議政

大臣三員以鞏阿岱圖賴錫翰

貝勒巴雅喇之子鞏阿岱之弟譚

布巴哈阿喇善阿爾海達哈塔勞薩布賽諱退巴布

賴漢岱阿爾津拜武拜雅賴揚善鄂羅塞臣哈寧

阿英固爾岱郎球額駙多爾濟薩木什喀起哈爾

錫翰

牛錄章京巴希之子

沙爾琥達德爾德赫等充之

先是貝

勅代魯三貝勒莽古爾泰之次有議政十貝勒八大臣又有佐管十六大臣及調遣十六大臣至是始添設八旗議是日政大臣各三員

御翔鳳樓集親王郡王貝勒貝子管旗大臣都察院承政

及新設議政大臣

諭之曰向來議政大臣或出征或在家有事諮商人員甚少偶遇各處差遣則朕之左右及王貝勒之前竟無議事之人矣議政雖云乏人而朕不欲輕令干預者以卑微之人參議國家大政勢必隨事唯諾取悅其主其貽

誤國計民生者不小國家安用此諂諛之輩為也今特
加選擇以爾等為賢置于議政之列爾等殫心為國主
輔其主當以民生休戚為念務使困窮之人有懷得以
上達新附之人撫養毋致失所朕時切軫念者惟有此
耳爾等凡有應奏之事不可越職遽奏如某事應施行
某事應入告當先與管旗大臣公議然後奏聞無知之
輩往往以進言者謂之讒人夫善則曰善惡則曰惡何
所忌諱而不言若植黨營私傾害善人指以為惡乃所

謂讒否則明知其人之惡而不以告是欺其主也聖經云欲齊其家先修其身脩身齊家而後國治爾等若謹好惡之施審接物之道御下以義交友以信如此則身脩矣孝其親敬其長恩惠及其子孫親戚如此則家齊矣身脩家齊而國有不治者乎太公曰閒居靜處而誅時俗非吾民也朕觀蒙古察哈爾林丹汗不道至于亡國未聞其臣有直言其主所行不道者嗣後朕或有失德爾等即當面諍試思以諫諍之故而斥責者為誰降

輩者為誰亦何憚而不為倘諫而不聽則非爾等之咎也若既不能諫而徒退咎其主上之失議其國事之非豈人臣靖共之誼乎或更有將各旗妄分彼此知本旗有悖亂之人隱匿不言及他人言之反加庇護者尤朕心所深惡也八旗皆朝廷之人但懾服姦宄撫恤困窮使各安統轄又何彼此之可分耶嗣今有將新分之呼爾哈瓦爾喀人使之逃亡凍餓致牛馬缺額者朕即不能養育之王貝勒下食口糧人戶補足其數王貝勒

等聚財積穀牧養牲畜豈僅為一身圖富足要皆為子孫計耳不知子孫果賢縱無所遺彼寧不能自立子孫若不肖雖有所遺豈能常守徒長驕矜且為他人積聚耳夫積穀所以備荒而養窮人也財帛牲畜所以為國而賞有功之人也不可奢亦不可過各朕所以令爾等撫養窮民及新附之人者蓋古人所云賞一人則勸者衆罰一人則懼者衆國家蒙

天眷佑諸國俱已削平獨明國尚在賞罰顧可不明乎又

諭諸王貝勒曰昔金熙宗及金主亮變易祖宗衣冠儀度
循漢人之俗服漢人衣冠盡忘本國言語迨至世宗始
復舊制凡言語衣服及騎射之事時諭子孫勤加服習
如王孫原王即章宗判大興府遇漢人訟事以漢語訊之
有女直人訟事則以女直語訊之世宗以其未忘女直
之言甚為嘉許此本國衣冠言語之不可輕變也我國
家以勤習騎射為業今若不時親弓矢惟耽逸樂則田
獵行陣之事必致疎曠武備何由而得飭乎爾等訓練

士卒勤習武事凡出師行獵許服便服餘俱遵照國初定制仍服朝服朕所以諄諄訓諭者非為一時計也正欲爾等識之于心轉相告誡使世世子孫遵守毋變棄祖宗之制耳朕意如此爾等宜各陳所見睿親王多爾袞等皆跪奏曰

皇上諄切誠諭臣等更復何言惟銘刻在心竭力奉行而已

閏四月癸卯宴朝鮮國王子李滄李湜

先是四月己卯睿親王多爾袞攜朝鮮國王二子及其大臣子至渾河岸

太宗遣都察院承政阿什達爾漢戶部承政英固爾岱刑部承政郎球及諸大臣率每旗侍衛十員出城十里許迎之設宴宴之至是

太宗御崇政殿諸王貝勒文武羣臣左右排列

召李滢李湔入殿內賜宴

命坐于右側安平貝勒杜度之下有蒙古貢獸名齊赫特

其形似驪有野駝其形似駝併黑狐皮俱令觀之
命通事傳諭曰此獸乃黃河外夏國所產或千百成羣此
黑狐皮乃東海濱使犬部所產每年來貢因遠方罕見
之物故令爾等觀之李湜奏曰此等異獸但于史冊聞
之今始得目睹

皇上聖德如天薄海內外珍奇之物何所不集臣等以微
賤之軀荷蒙

恩禮優隆並得

賜觀異物何幸如之宴畢李滢等率陪臣謝

恩而退

壬子武英郡王阿濟格自皮島凱旋

先是征朝鮮師還日

太宗命貝子碩託恭順王孔有德懷順王耿仲明智順王
尚可喜率每牛录甲士四人及三王下全軍舁紅
衣礮十六位并朝鮮戰船五十往取明皮島復遣
前鋒將領撫爾德傳

諭睿親王多爾袞等曰管旗大臣葉臣阿山令其往助貝子碩託與漢軍大臣石廷柱及孔有德等會集一處定議往攻皮島日期及我國戰船與朝鮮戰船約會何處從何處乘船于何月日進攻又朝鮮戰船果足派往之數否兵若干領兵者何官查核明確令蘓爾德來奏至其島若易攻則攻之否則奏明候朕諭到攻之我軍船首須用遮牌前攻江華島之船曾帶來否其船式可用即依式製造三月丁未復

命武英郡王阿濟格率兵千人往助征皮島軍四月辛巳
武英郡王阿濟格奏報攻克皮島疏云臣等仰仗
皇上天威遵奉

指授方畧于四月初八日遣八旗甲喇章京領護軍以大
臣薩木什喀督之續遣步軍章京領步兵以大臣
阿山葉臣督之乘我國所造小船攻皮島西北隅
八旗騎軍章京領騎兵四邊城章京領全軍四百
人及漢軍孔有德等兵朝鮮兵各乘巨艦令兵部

承政徹爾格統領前進並令領漢軍大臣石廷柱
戶部承政瑪福塔從皮島北隅督戰時乘小船兵
先進遂克其島斬其守島總兵沈世奎越五日復
奏報擊敗明兵一萬七千有奇斬殺甚衆并籍所
獲水手三百五十六名婦女幼稚三千一百十六
口駝馬牛騾等六百四十有奇大船七十二隻紅
衣法煩西洋礮共十位及蟒素緞銀兩布疋器皿等
細數以

聞是月己亥朔武英郡王阿濟格又遣內秘書院學士占
巴奏言在皮島得米六百一十六石大小礮六十
七位尋

命將所獲米糧即令朝鮮船隻運至義州派每牛录下殷
實之家有朝鮮馬騾者各出六頭運送

東京賑饑至是

太宗以武英郡王阿濟格與貝子碩託等自皮島率師還
命睿親王多爾袞饒餘貝勒阿巴泰率諸大臣出城十里

許迎于渾河岸次日癸亥

太宗御崇政殿武英郡王阿濟格率凱旋貝子大臣捧表

跪進宣

諭畢行三跪九叩禮阿濟格碩託扎哈納阿山葉臣薩木

什哈等以次進見再行一叩禮抱

上膝見復行三叩禮而退

六月辛亥叙錫特庫等追勦喀木尼堪部逃人葉雷

功

先是天聰十年

太宗命阿賴達爾漢率外藩蒙古諸貝勒兵往追茂明安

部下逃人至使鹿部喀木尼堪地方招服葉雷舍

爾特庫巴古柰土古柰等及其從役家口來獻俱

賜冠服索鍵等物有差葉雷等旋往盜科爾沁部占巴拉

天聰八年秋七月與其弟塞爾固楞率兵來朝部下馬八百匹及東圖王

即洪部下馬四十五匹而逃是時東圖王及伊勒

都齊貝勒

即棟果爾

伊爾登

即布木巴哈坦巴圖魯

即顧穆二人皆

郭爾羅斯部長

等所屬有四五家散處及出外探捕約五

十人皆被殺秉圖王部下十七人追及之逃人還

擊殺三人又奪馬十七匹而去經

興京守將扈什塔奏

聞

命甲喇章京錫特庫執信牌往寧古塔會同守將武巴海

率寧古塔兵追之又遣正黃旗牛錄章京噶爾糾

執信牌率卦勒察兵沿烏拉地方追緝又遣蒙古

衙門撥什庫博羅執信牌往科爾沁部令土謝圖親王巴達哩卓哩克圖親王武克善發兵躡追兼令防失牲畜錫特庫等率二十二人躡逃人踪跡自多爾博庫地方行至烏拉駐防邊城武巴海率四十五人來會時科爾沁部土謝圖親王下鄂爾多木卓哩克圖親王下託和泰奉

命率兵二百往尼喀善城駐防聞信即簡甲士四十人往追占巴拉之弟塞爾固楞貝勒亦率所部兵橫截

追之鄂爾多木追之博木博果爾地行月餘會遇
武巴海錫特庫同行途次見天鵝三鄂爾多木射
中其一帶箭而飛逐取忽不見乃見逃入營中遺
火遂星夜馳往至溫多地方圍之諭降不從因攻
殺九十四人生擒八十七人獲馬五十六匹問葉
雷安在答云葉雷殺鹿為食攜妻子遁去矣錫特
庫武巴海即率兵前進葉雷聞知乃殺其妻子遁
入山中我兵追至與葉雷縱矢交射忽有白狐躍

起觸葉雷弓而馳因射殺葉雷有葉雷兄弟率四十人携妻子欲歸我國途遇葉雷留之亦被殺五月癸未奏

聞錫特庫等凡七閱月始還

太宗命管旗大臣出城五里迎宴之至是叙遠追逃人功擢武巴海錫特庫噶爾糾世職加

賜衣服馬匹奴僕莊田

賜鄂爾多木號卓哩克圖庫魯克達爾漢子孫世襲其隨

征士卒並

賞銀兩衣服有差

甲寅

諭諸大臣勤脩國政

太宗諭曰昔太公云天生四時地生萬物天下有民聖人
牧之故春道生萬物榮夏道長萬物成秋道歛萬物盈
冬道藏萬物靜盈則藏藏則復起莫知所終莫知所始
莫進而爭莫退而遜守國如此則與天地同光朕承

皇考創業垂統嗣位以來統一蒙古收服朝鮮自今以後
宜思所以宣布法紀脩明典常當國運茂隆之時若不
立綱陳紀次第振興後人將何所法守嘗觀前代勤脩
國政法制精詳者其祚必永怠棄國政苟且偷安者其
勢必危蓋治國之道如築室然基址堅而庀材固世世
子孫可以久居其或旦夕成功不久即壞此必然之勢
也國家若果勤脩政事何由致敗否則傾危立至矣嗣
後爾等皆宜殫竭忠誠勸勸左右朕惟欲整飭庶務使子孫

金史紀事本末卷之二十四
永守勿替耳

丙辰以平朝鮮功祭告

太廟

先二日

太宗夜夢至

興京見

太祖乘飛騎行禮親王代善追挽

太祖之騎不及

太宗遂至明國宮中明皇帝於袂內出一絲絛總上飾以珊瑚意欲相授

太宗默思明主欲贈珍寶何所不有受此奚為轉顧其人又非明皇帝乃金代神像其人出書一冊曰是爾先代金國史書

太宗受而讀之文字不能盡辨欲持以示文臣夢忽覺次日清晨

召諸王貝勒及內院諸臣語之諸臣奏曰先是

皇上夢入朝鮮王宮內將朝鮮王舉之而起未幾果臣服

朝鮮今將告捷于

太廟故夢見

太祖至入明宮見明主及金人授以金史是

天意將以明國圖蘇授

皇上也至是以朝鮮既平又乘勝克皮島

親詣

太廟行祭告禮並遣官祭告

福陵

甲子

賜恭順王孔有德等銀幣仍

誠諭之

以恭順王孔有德懷順王耿仲明智順王尚可喜

協同武英郡王阿濟格攻克皮島各

賜銀六百兩及彩緞蟒衣布疋等物並查明部下陣亡各

官

賜卹其家

太宗諭有德等曰朝廷用人以高爵厚祿使之安富尊榮者欲其襄贊治理有裨國家也朕于爾三王既以殊恩拔擢情同子弟封以王爵寵眷有加爾等宜感恩圖報恪守典常乃不思竭忠盡誠輔助國政反縱所屬將士悖違法度恣意妄行朕甚不悅爾等有統率之任知他人有違法者尚應責之乃身先作惡朕復何賴焉古語云爭小利者不受大益爾等何不勉圖大益而顧貪小

利也嗣後務整肅戎行以佐成大業實嘉賴之尋有智
順王尚可喜家人於刑部首告其主云皮島之役王私
匿其所得金帛人口牲畜

太宗曰諸物豈王自得必散于衆兵耳彼新人不知故來
首告此案刑部不必審訊以原告發還智順王

秋七月己巳叙平定皮島功

先是兵部奏言征明皮島時陣亡四十人骸骨莫
能辨識今就所收者合塋于通遠堡

太宗命禮部叅政圖爾賽賁楮帛羊酒為文以祭之至是
叙功擢鰲拜準塔薩木什喀阿山葉臣麻克圖鍾
金多爾津等世職有差並贈陣亡炳圖世職以其
弟畢禮克圖襲瑚什世職以其子瑚雅祿襲
卒未遣武拜等往歸化城

先是遣丹岱等往土默特貿易嗣又

命阿爾津為帥偕鄂謨克圖譚拜譚台柱孟庫魯喇嘛尼
堪翁阿岱彰屯等率商人百餘及八家官員攜貨

往歸化城貿易至是遣前鋒將領武拜努山瑚密
色鄂碩沙爾琥達蘇爾德阿爾布尼喀扎海率護
軍校八員護軍百名往歸化城

諭之曰爾等此去可于特墨圖地方駐劄前丹岱等往土
默特貿易如其未至特墨圖地方爾等與之相遇可即
往察希爾圖地方探視若不相遇且于特墨圖地方屯
駐候丹岱等及後去之阿爾津等事畢乃還倘伊等未
能即還則與之約定歸期不必相候如十日內可還則

候之同歸恐明人中路要截宜加意備禦也後武拜等
於八月庚申出張家口與岱丹等合遇明哨卒十六人
斬十五人生擒一人獲馬十九匹而還

乙未分立漢軍二旗

辛巳

太宗諭諸漢官曰朕將爾等與舊臣一體撫育或更優于
舊臣今舊臣中有如爾等之獲免徭役者乎若以功論
諸舊臣隨朕各處征伐身經百戰攻城則克遇敵則勝

用能大造我國家以有今日也爾漢官有乘時歸命者
有窮蹙投誠者有陣獲恩養者在爾等何嘗披堅執銳
親冒矢石効死力戰乎昔年爾諸臣中有與明國暗通
潛謀叛亡者事泄被誅骨肉離散又諸臣管轄爾等強
取財物苦無容身之地自朕嗣位以來爾等有先與明交
通者朕原其罪而赦之其無故誅求者復行禁止另立
旗分予以矜全出爾等于塗炭之中愛養有加朕之待
爾等可謂至矣乃不思訓練士卒効力疆場見滿洲官

兵之致死力戰者視同陌路若無與已事者爾等平日以空言欺飾謂勿虐小民勿侵降國勿劫貨財為國家分憂効力當行仁講義以此陳奏者頗多及行師時反身先倡率徇縱士卒攘奪財物則爾等之空言欺飾朕已洞燭之矣前牛录章京張成德曾獲敵船二隻俘三十八人爾等即不能奮勇爭戰但能如張成德之俘獲猶為有益若此時不自省悟力圖報効國家安用此虛糜富貴之人哉至是分漢軍為兩旗以石廷柱為左翼

管旗大臣馬光遠為右翼管旗大臣照滿洲例編
壯丁為牛录

八月癸丑

御演武場觀外藩使臣較射

是日辰刻

太宗率親王郡王貝勒貝子等出懷遠門至演武場

御黃幄外藩貢使朝賀畢

命喀爾喀瑪哈撒嘛諦車臣汗下使臣土謝圖汗下使臣

俱于本月奉表較射次選每旗善射者各十人分
來貢駝馬等物

為左右兩翼令之角勝負者罰牛羊諸王貝勒貝
子等親率較射三次右翼中多得牛二羊二十又
令左右各出力士角觝右翼負還所得左翼牛一
羊二于是令左翼諸王貝勒等負者俱立宴并宴
外藩朝貢使臣申時還宮

九月己巳禁止蒙古部人訐告強奪

前遣都察院承政阿什達爾漢蒙古衙門承政塞

稜尼堪等往科爾沁巴林扎魯特喀喇沁土默特
阿魯諸部會集諸王貝勒等

頒布赦詔清理刑獄

太宗以敕書諭阿什達爾漢曰朕聞扎魯特部內齊等虐
害所兼管之塞稜綽博惠等縱部下人潛行訐告塞稜
綽博惠之有一二牲畜者誣而取之彼等既屬同居又
相統轄其有無財貨彼此悉知若皆被誣訐強奪所有
人將何以為生且令彼兼管者本欲其愛養之而反虐

使之乎若果如此擾害若輩之牲畜既盡朕必仍取害
人者之牲畜與之前曾以此誠諭內齊等業經認過復
謾其咎于兄弟朕固不之信也爾等可弼孔嚮特數日
詳審從前告許奪取牲畜之人如實則已否則即以所
罰牲畜給還本主並嚴切申禁嗣後毋得少有侵害爾等
此行以此為第一要務其詳慎議之

丙戌

諭給各牛录下斃獨者妻室

太宗諭親王郡王貝勒管旗大臣等曰朕聞駐防開城博爾惠牛录下有兄弟二人皆無妻室現在各處俘獲婦女甚多如此覓獨可矜之人該管大臣章京等不以奏聞朕何由知嗣後務查明各牛录下無妻室者給以妻室善加撫養國家蒙

天眷佑歸附者衆若不能撫卹困窮其何以勸來者可將朕意徧諭各官

冬十月丙午厄魯特部遣使入貢

厄魯特部願實車臣綽爾濟遣其頭目庫魯克來
貢馬匹白狐皮獺喜獸羆毯等物願實車臣綽爾
濟初未入貢聞

太宗德威遠播于丙子年遣使因路遠至是始至是日黑
龍江巴爾達齊率五十七人朝貢又精格里河琿
春屯內扈育布祿初未入貢至是亦來朝貢貂皮
俱令禮部迎宴之

賜扈育布祿及其從人蟒緞朝衣冠帶橐韃弓矢鞍轡等

物有差

庚申封李倬仍為朝鮮國王

朝鮮義州總兵林慶業領兵隨征皮島有功至

盛京朝

見宴之將遣還內院諸臣撰擬

宣諭朝鮮敕書進呈

太宗覽畢曰爾等撰文當順理措詞毋得過為誇大朕素
不樂聞誇大之言彼明國之主自比于天輕視他人蓋

身無德義徒自矜張甚無謂也嗣後撰擬切宜詳慎毋蹈浮誇于五月丁亥令林慶業賁

敕諭及銀幣馬匹歸

賜國王李侖至是復

命戶部承政英固爾岱瑪福塔率從官通事賁玉紐金印
誥命并黑狐套一領製帽黑狐皮一張貂皮百張
鍍金雕鞍良馬一匹往

賜李侖仍為朝鮮國王

十二月癸亥征瓦爾喀諸將奏捷

先是正月癸亥

太宗于朝鮮軍營遣外藩科爾沁扎魯特教漢奈曼諸部
兵出朝鮮咸鏡道往征瓦爾喀

命蒙古衙門承政尼堪甲喇章京吉思哈牛錄章京葉克
舒率每旗甲士十人薰之以行道出會寧擊敗朝
鮮平壤巡撫兵二千人餘兵悉降五月十九日至
烏拉地方遣還蒙古十六旗兵七月己巳復

命喀凱塔克珠來虎舒書翁愛尼噶禮克布圖輝山恩古
里雅薩諳巴巴爾噶遜綏赫德珠瑪喇綽貝塔哈
布海塞蒙格哈什屯雅布喀棟果爾滿都祜占楚
喀音達禮等率兵一千二百分為四路往征瓦爾
喀兩黃旗一路率阿庫里尼滿地壯丁一百名穆掄
分達哩壯丁四十名烏爾固辰地南濟蘭牛录下喀
克篤哩兄弟等壯丁三十名共一百七十名以圖
必善分達哩瑪哈達為嚮導兩紅旗一路率綏芬

壯丁七十名雅蘭壯丁四十名呼業壯丁二十名
烏爾吉壯丁七十名共二百名以圖球恰塔齊什
訥為嚮導兩藍旗一路率額赫庫倫壯丁六十名
厄勒以東塞木克勒以西壯丁五十名共一百十
名以愛韜多爾周常濟里濟布楚為嚮導兩白旗
一路率諾囉阿萬壯丁三百名以雅爾布佛得密
封濟達蘓布特赫為嚮導至是諸將遣六人奏捷
言兩黃旗舒書塔克珠率甲士六十人入烏爾固

辰獲塞約愛塔哈佛珠武克星額塔克圖男子三十
名家口八十馬七十有三兩紅旗恩古里克布圖
率甲士六十人入綏芬獲剛球畢爾哈木巴爾珠
男子二十八人家口六十五兩白旗哈什屯滿都
祜于所入汎地獲吉木善伊訥肯索畢伯得根哈
里瑚阿爾珠克木訥畢爾珠男子一百三十人家口
三百三十馬八十有三並獲貂狐捨狍獐水獺等
皮張甚多于次年四月師還

賜新獲瓦爾喀男婦幼稚等衣服居室器用牲畜等物并
賞喀凱等從征兵丁銀兩有差

戊午丹岱等擊敗明兵于清河

武英郡王阿濟格于牛莊遣丹岱薩蘓喀譚拜拜
賽率護軍四十人騎兵四十人往白土場捉生遇
明兵七百余于清河突入擊敗之獲馬二十有二
二是月赫葉氏十人及托科羅氏默爾哲勒氏巴
雅喇氏三姓遣二十二入貢貂皮等物

皇清開國方略卷二十四

欽定四庫全書

皇清開國方略卷二十五

太宗文皇帝

崇德三年戊寅正月至七月

崇德三年春正月甲午

世祖章皇帝生

世祖章皇帝

太宗第九子也

母

孝莊文皇后時為

永福宮莊妃娠十有一月

二月丁酉

親征喀爾喀

先是正月庚辰駐守歸化城土默特左翼部長古

祿格遣扎幹等三人奏言臣等偵知歸化城北有

喀爾喀部扎薩克圖汗

巴延達喇長子魯瑚爾

率兵及家口

周圍駐營似欲侵犯我城乞速發大兵以備之

太宗御篤恭殿

諭諸王大臣曰喀爾喀侵犯歸化城爾等其令軍士早夜秣馬預備糗糧朕將親統大軍討之二月丁酉

太宗率豫親王多鐸武英郡王阿濟格郡王阿達禮貝勒岳託貝子大臣及護軍等於午刻出撫近門謁

堂子啓行

命禮親王代善鄭親王濟爾哈朗睿親王多爾袞安平貝勒杜度饒餘貝勒阿巴泰等留守是日

車駕出沙嶺舊邊駐營己亥遣拜賽偕十六人往探扎薩

克圖汗踪跡丁未駐軍喀勒占外藩科爾沁部長

土謝圖親王巴達哩扎薩克圖郡王布達齊卓哩

克圖親王武克善巴圖魯郡王滿珠什哩喇嘛什

希穆齊占巴拉塞爾固楞等扎賚特部長達爾漢

和碩齊蒙袞等奈曼部長達爾漢郡王袞楚克等

教漢部長額駙班第等扎魯特部長內齊尚嘉布

子內齊

桑圖桑古爾扎木素桑阿爾

子色本

巴雅爾圖

青巴圖魯

即瑪尼

茂奇塔特

瑪尼子

額騰多爾濟等阿

噶科爾沁部長穆彰達賚海色固魯等四子部長

達爾漢卓哩克圖鄂木佈伊爾扎木索諾木等茂

明安部長巴特瑪瑚梭等巴林部長滿珠什哩阿

玉什等翁牛特部長達爾漢岱青薩揚達拉海巴

木布班第噶爾瑪

即喀喇卓哩克部長

等各率所部兵來會

獻駝馬俱却之遂行至錫喇穆綽喀喇穆綽兩河

交界處駐營戊申大軍至哈納哈達壬子過興安

嶺行獵是日駐營達勒諾爾東癸丑拜賽自歸化城還奏言喀爾喀扎薩克圖汗驚聞大軍將至已於正月三十日倉皇遁去

太宗疑其或逐好水草處藏匿復遣莽奈都爾率八人往探於是行獵至達勒諾爾西壬戌遣前鋒將領勞薩梅勒章京錫特庫等自多原齎

書諭明宣府各官曰壬申之夏朕率大軍往征察哈爾察哈爾汗聞風遠遁歸化城及各寨部衆咸歸於朕彼時

曾謂宣府執事人等曰爾宣大之人無怨於朕惟遼東邊吏欺詐特甚朕故征之今爾等與朕脩好互市凡歲幣之與察哈爾者應悉與我爾云察哈爾汗雖遁其身尚在倘復來索歲幣奈何故雖與而不盡如例但與我講和通市因對

天地盟誓大軍遂不入境而還嗣後朕踐此盟言靜俟一載兩次遣人致書爾竟背盟未答一語朕是以有甲戌之役今天下蒙古入我版圖朝鮮為我藩服察哈爾汗

畏威遠竄身死國亡妻子臣民我悉綏定曩時推諉之
辭謂察哈爾汗尚在也今更將何辭以對乎彼北邊蒙
古喀爾喀者非與爾有盟誓之好也乃與之歲幣開市
而結盟之國反不與歲幣開市者何哉朕今親統大軍
駐布顏阿海遊牧之地以待爾如能悔過無棄盟言則
不入爾宣大之地止征遼東夫逞則征伐和則貿易古
亦有之爾若不審

天時而逆朕命朕當令朝鮮蒙古諸大軍分路縱略廢爾農

時恐後悔無及也朕以實告爾爾其速圖而裁答焉並面諭勞薩等曰爾等若遇喀爾喀部人衆多力不能勝即還報能勝則取之拒者殺之三月甲子朔自多原至博碩堆遣牛录章京法談等賁

勅諭留守諸王曰喀爾喀為漢人所恐云大清兵已至矣彼遂驚懼未敢犯我歸化城亦並未與漢人文市於正月三十日倉皇而去但恐彼去未遠已遣人往探若果未遠朕必前往其糧米須待此處人到輸運不然朕亦

竟從此班師行糧已足不必更運矣越二日丙寅知札薩克圖汗果率兵遠遁於是

命王貝勒以下梅勒章京以上各出銀赴歸化城貿易尋遣大學士剛林齋信符赴

盛京令速發駐防前鋒兵以迎之甲戌駐軍宜喜里勞薩等還奏路遇蒙古碩雷使者往明國交易獲其馬百四十駝四十其蒙古四十人給以羊隻為行糧遣之去獲二漢人還

太宗曰何為輕釋蒙古耶復令勞薩等率每旗章京一員

甲士十五人於夜分往追之以所獲駝馬

賜一等公以下牛录章京以上各官後法司議勞薩等違命縱敵之罪得

旨從寬罰懲

辛酉宴新附烏珠穆沁部車臣濟農等

烏珠穆沁部車臣濟農

即多爾濟聞

太宗惠養國人恩意周至率奇塔特台吉偉徵塔布囊索

諾木塔布囊博倫塔布囊達拉海納穆琿津等三

十人舉部來附

賜宴清寧宮

事在崇德二年十一月至是

車駕至多原車臣濟農等率其長子塞稜次子桑阿爾齋

三子垂僧格四子德音楚克及同部噶喇木扎布

蘇格岱青錫達索諾木都斯噶爾和多和沁伊勒

扎爾山津武克索木伊勒畢斯德勒格爾塔布囊

衮桑班第岱阿哈土謝圖等來會師進獻駝馬甲

胄等物令車臣濟農朝見設黃幄列儀仗王貝勒
以下羣臣依次立帳外

太宗於巳刻出行幄率車臣濟農等拜

天畢

御黃幄車臣濟農率其所部貝勒及臣屬朝見具筵宴進
上同來會師之阿巴噶部噶喇木扎布蘇尼特部武善伊
勒登塞稜達爾瑪等浩齊特部博羅特推囉阿納
特塔布囊雅達固什等亦於是日朝見各獻駝馬鞍

轡均酌納之

賜大宴

命較射角觥

賜甲冑雕鞍弓矢銀幣有差尋遣還

夏四月甲午朔征卦勒察諸將奏捷

先是

太宗率諸王貝勒等西獵於大草灘卓索圖爾格尼等處

事在崇德二年十二月

命葉克舒為右翼大臣星訥為左翼大臣與其下阿福尼
赫葉訥瑪喇希喀木齊哈喀爾喀瑪鄂謨克圖薩
哈納穆成額叟塞阿林巴雅爾圖塞赫哈喇勒岱訥
爾特穆圖希福等率兵六百往征卦勒察葉克舒
星訥等師至薩哈勒察俘獲男子六百四十名家
口一千七百二十名馬一百五十六匹牛一百有
四頭至是

盛京留守諸王遣兵部啓心郎占巴等賁疏以

聞遣禮部承政庫魯克達爾漢阿賴祝世昌姜新等迎宴
之尋以所獲薩哈勒察等衣服

賜兩翼大臣并

賞從征將士銀兩有差

庚子改都爾弼城為屏城

先是崇德二年八月

太宗以將築都爾弼城

命睿親王多爾袞相度基址饒餘貝勒阿巴泰率八旗每

甲喇章京一員每牛录甲士二十二人夫役十人
前往興工又遣甲喇章京伊爾德訥爾特敦拜錫
翰等率護軍四十人防衛築城夫役本年二月
命留守王貝勒等監築都爾弼城及遼陽城三月

太宗於博碩堆行營遣牛录章京法談等賁

敕諭留守諸王等曰朕曾有旨命仿都爾弼城規模築遼
陽城今觀都爾弼城甚小大軍出征之後遼陽乃駐防
重地士馬繁多何以能容若城基未築可每面再廣十

丈朕籌畫再三故有是命至是次鄂岳博洛令每三丁出夫一名協濟築城夫役工竣改名為屏城

賜門額曰安邊門廣邊門

乙巳

車駕還

盛京

太宗於三月庚辰自登努蘇特班師大軍次克依綑之次

日

賜外藩科爾沁奈曼教漢扎噶特四子翁牛特巴林茂明
安等部諸王貝勒等貂裘鞍馬衣服等物並

賜宴遣歸以翁牛特部達爾漢岱青下塞內琿津正黃旗
阿爾哈車臣每遇會議聽斷勤勞平允

特賜車臣號扎爾固齊

賜塞內琿津豹裘緞布辛卯度興安嶺至溫泉壬辰至烏
蘭哈達癸巳至錫爾哈夏四月乙未至遼河己亥
至察木哈越二日戶部承政英固爾岱瑪福塔攜

御用馬匹來迎並奏言臣等往鳳凰城等處開擴邊境自

鳳凰城至鰲場自蘭磐至鳳凰城較舊界各擴出

五十里此二百里所需釘椿繩索恐鳳凰城應用

不敷令沿邊四城協力均濟又自蓋州至熊

熊岳耀

耀州較舊界擴出四十八里其釘椿繩索令四城均

辦壬寅

太宗至遼河

閱視新築城垣乙巳至

盛京自外攘門入還宮

丁未定戶部年終考核例

先是都察院承政祖可法張存仁等疏劾戶部承政韓大勲侵盜庫中金銀鞠實擬辟

太宗命革職貲其死至是祖可法張存仁等再疏請誅韓大勲又疏言戶部職司錢穀其任匪輕現無舊管新收開除實在四柱冊檔年終又無考核之例則收放既無定額同官又無責成此韓大勲窺之已

熟所以敢於侵盜也請嗣後

勅戶部速立四柱清冊於年終核實稽察以杜弊端則官吏可以肅清而倉庫無由侵尅矣又勅吏部刑部復用賊吏陳七違

旨壞法

太宗皆嘉納之

五月癸酉脩治道路

太宗命睿親王多爾袞饒餘貝勒阿巴泰等董理修治道

路之役自

盛京至遼河大路兩傍濬壕中間增土高三尺廣十丈令八家及八旗每牛录甲兵六十及恭順王孔有德等屬下甲兵皆赴工給羊六百犒之

六月庚申設理藩院

更定蒙古衙門為理藩院專治蒙古諸部事是日授土默特部章京古祿格等二十二人世職各按品級分別授之尋鑄給理藩院印信

秋七月壬戌朔

諭誠諸王大臣遵行定制

太宗命內宏文院大學士希福內國史院大學士剛林等
傳

諭諸王大臣曰凡親王郡王貝勒貝子公主額駙名號等
級均有定制今竟不遵行違棄成憲皆由禮部不嚴加
稽察以致苟且陵替如制度有不可行於創行之初即
當奏請改正乃方創制時皆稱曰是及裁酌已定又復

棄之此何心也昔金太祖太宗兄弟一心克成大業今朕創業伊始爾等不能同心體國恪守典常朕復何賴焉諸王等奏曰恭承

聖諭罪在臣等若臣等躬行正道誰敢有不奉行者嗣後當各修其身勉力遵行若仍怙惡不悛自當罪及其身矣

丁卯

諭遣喀爾喀扎薩克圖汗使臣

喀爾喀部扎薩克圖汗下使臣達爾漢囊蘇喇嘛
等於三月庚午來朝進獻駝馬綵緞等物至是遣

還

太宗諭之曰朕以兵討有罪以德撫無罪惟行正義故

上天垂佑將蒙古諸部悉以畀朕今蒙古主察哈爾汗之

子現在朕加意撫養爾喀爾喀部當念爾主既在我國

即應歸順以安其生反興兵構怨來侵我歸化城甚非

爾分所當為也朕欲平定區宇理應加兵於爾爾亦當

以加兵是懼想爾以為奔往征討所不到之處便可偷安旦夕但爾所能至我師豈有不能至者乎昔金遼元三國之主西伐額訥特珂克東抵朝鮮北及黑龍江南至于海朕今日正與相等爾知罪而來則已否則必不爾宥又

諭曰我國行事悉循大義雖興師征討從不加戮使臣頃所言者爾主之咎於爾何尤

命賜之食囊蘇喇嘛不勝欣幸更無一語回奏良久曰仰

承

聖諭當往導吾主愚蒙爾

壬申

召見新附總兵官沈志祥

先是二年九月

太宗命內宏文院學士瑚球禮部叅政蔡永年等往石城

島對岸

予書明守將沈志祥曰朕聞將軍脫皮島之難復集潰卒

殺明國黃監軍白副將奪陳洪範兵朕意將軍必率衆
來歸專待久矣乃仍猶豫未決耶今將軍欲歸明國則
明國皇帝屢有旨命救朝鮮而將軍違命不救又擅殺
監軍及奪陳洪範兵此罪決不爾赦若不速來歸附朕
既蕩平皮島豈容爾久據石城朕敕朝鮮收集各處兵
船與我軍合力進取事在旦夕彼時歸朕無功歸明無
路悔之晚矣曩曾以此意招沈世魁世魁不從今安在
哉

沈世魁遼東人明總兵官志祥從父我軍征皮島世魁戰死志祥遂收潰衆至石城島索世魁敕印不得

乃自稱總兵官朕言非誇為爾等開導爾將軍其熟思之本年

二月志祥遣部將吳朝佐金光裕賫疏至

盛京投誠旋率領副將八員叅將八員遊擊十六員
都司二十員守備三十員千總四十員兵丁及家
屬四千餘人自石城島起行至黃古島候

旨

太宗遣內宏文院學士瑚球戶部承政瑪福塔等勞之於

安山城

命重加撫慰設大宴宴之鐵嶺撫順二處任其自擇居住

志祥聞

命欣感奏言願駐撫順遂發車騎俾移衆安輯其官屬兵民俱給以房屋及一切器物尋以其兵民等屢有逃亡復遣內國史院學士羅碩等傳

諭志祥及其部衆曰方爾等來歸時朕駐軍在外是以未及加恩爾等何以遽懷去志現在各邊防兵哨卒周圍駐守去將安之倘被擒戮朕心殊為不忍自今以後勿

再逃亡朕當加意愛養爾等也志祥奏曰

主上厚恩諄切開示凡逃亡者皆昏庸不知法度之人若

良民安肯逃哉是月庚午遣禮部官

召志祥至先

命承政滿達爾漢姜新等於五里外迎宴之是日

太宗御崇政殿志祥率所部官朝見獻蟒緞布疋等物俱

不納

賜志祥蟒衣涼帽玲瓏鞵帶貂皮狴狽獬豸皮豹皮裘弓

矢橐鞬雕鞍甲冑駝馬仍

賜宴禮部越六日

召志祥於

內廷宴之

命七家以次更宴及還鎮遣官餞送如初

丁丑

諭禮部申明禁令

太宗諭禮部曰國家創立制度所以辨等威昭法守也若

不嚴行懲儆無以垂久遠自後王貝勒貝子犯者議罰
官員犯者幽繫三日議罰庶民犯者枷號八日責治而
釋之凡出入起坐有違誤者坐以應得之罪一切官階
名號已經更定而仍有錯誤者嚴行戒飭之若有效他
國衣冠及婦女裝束違制者是身在本國而心在他國
也犯者俱從重治罪著為令又

諭都察院承政張存仁祖可法等曰爾等果盡忠為國凡
有見聞即應據實陳奏則委任庶為有益若禮部承政

祝世昌奏請禁止陣獲良人婦女賣充樂戶一疏祝世昌豈不知樂戶一事朕已經禁革不過徇庇漢人借此立言要譽耳朕於滿洲蒙古漢人視同一體爾等同心輔國譬諸五味調劑貴得其宜若滿洲徇庇滿洲蒙古徇庇蒙古漢人徇庇漢人是猶鹹苦酸辛之不得其和也爾等回護世昌而不劾奏咎在爾等曾子曰吾日三省吾身爾等能如曾子之省察其身則何過之有又諭親王郡王貝勒貝子等曰爾等為朕股肱耳目見朕所

行有未當處即當直言進諫朕亦樂於聞過以便改圖
今國家蒙

天眷佑爾等亦坐享豐盈其在下之人或有困窮而衣食
不足者或有無故冤抑者與其在外嗟怨退有後言何
不令困窮之人自言困窮冤抑之人自言冤抑且爾等
苟知之亦應入告於朕若朕知其困窮而不加恩養知
其冤抑而不為昭雪是朕之過也至於舉錯好惡尤當
協於大公若衆人所舉而反惡之衆人所錯而反好之

必至變易是非倒置功罪一經敗露卽爾等亦身被黜辱所偏好之人尚得在爾左右否古人云越山易越法難爾等宜能自越於立法之外耶又

諭大學士希福剛林學士羅碩等曰朕從來不喜以空言文飾要取虛譽昔漢文帝欲建一臺計費百金以爲百金乃中人十家之產遂止而弗建朕謂此亦空言要譽殊不足取朕蒙

天眷佑各國臣服財用饒裕當此之際我國新舊人等有

困窮無告者若不急加恩養更於何時養之人君宵旰
勤勞以修治道理理財裕國亦為民而已今財物牲畜何
者不有若吝惜而不以養人留之何用耶希福等奏曰
皇上此言誠萬民之福也前代之君積聚財物未有歷久
長存見稱於後世者惟散財養人乃為

聖朝盛事耳又

諭侍臣等曰我國家景運方興爾等職在大臣正當為國
憂勤以功名自建朕與王貝勒等所行何無一人指陳

得失者爾等從前或臨陣不能治兵或所行貪黷經朕
加罪者有之亦有因直言進諫而加之罪者乎爾等平
日見賢不能舉見不善不能退既不能退矣迨其獲罪
又羣起而非議之若於已無與也夫見賢不能舉則賢
者何由而勸見不善不能退則不肖者何由而懲公忠
為國之人見其人之賢雖讐猶將舉之見其人之不善
雖親猶將黜之今爾大臣中有因戰功而令管旗務及
六部承政者亦有雖無戰功因辦事公正令管旗務及

六部承政者豈一朝富貴遂忘公正耶名為大臣上不能為國下不能為民國家亦安用此緘口藏身之輩為也又遍

諭新舊滿洲蒙古漢人曰爾等有家貧不能娶妻及披甲不能買馬者許陳訴於本管章京本管章京申訴於管旗大臣管旗大臣啟知本管王貝勒等核實給與如王貝勒等力不能給即以奏聞隱匿者罪坐本管官仍許赴戶兵二部陳訴蒙古之人赴理藩院陳訴其已給而誑稱未給

者追奪所給之物不復加罪朕明降諭旨若爾等畏威不言是自坐困窮朕無由而知也

丙戌更定部院官制

先是六部都察院理藩院滿洲蒙古漢人承政每衙門各三四員其餘皆為叅政官止二等至是范文程希福剛林等奏請每衙門止宜設滿洲承政一員以下酌設左右叅政理事副理事啟心郎主事等官凡五等

太宗可其奏於是

命睿親王多爾袞更定八衙門官制以阿拜為吏部承政
色勒祖澤洪為左叅政薩壁翰滿珠什哩鮑承先
為右叅政理事官四員副理事官六員啓心郎三
員

滿洲一員漢人二員
以下各衙門俱同

主事二員以英固爾岱為

戶部承政瑪福塔吳守進為左叅政塞稜車臣鄧
長春德穆圖為右叅政理事官十員副理事官十
五員啓心郎三員主事二員以滿達爾漢為禮部

承政已延超哈爾為左叅政阿賴庫魯克達爾漢
陳邦選鄂謨克圖為右叅政理事官四員副理事
官七員啓心郎三員主事二員以伊遜為兵部承
政祖澤潤穆成額為左叅政古爾布什葉克舒佟
圖賚為右叅政理事官十員副理事官十六員啓
心郎三員主事二員以郎球為刑部承政武達海
孟喬芳為左叅政布當李雲星訥為右叅政理事
官六員副理事官八員啓心郎三員主事二員以

薩木什喀為工部承政徹爾格裴國珍為左叅政

囊努克武善楊文魁為右叅政理事官八員副理

事官十員啓心郎三員主事二員以阿什達爾漢

為都察院承政索海多爾濟達爾漢諾顏為左叅

政祖司法張存仁為右叅政理事官六員

滿洲蒙古漢人

員以貝子博洛為理藩院承政塞稜為左叅政

尼堪為右叅政副理事官八員啓心郎一員

四年正月

吏部奏請增設理藩院
每旗章京一員從之

皇清開國方略卷二十五

欽定四庫全書

史部

皇清開國方略卷三十六至

內閣中書_臣沈鵬覆勘

總校官原任侍講_臣王燕緒

欽定四庫全書

皇清開國方略卷二十六

太宗文皇帝

崇德三年戊寅八月
辛卯三月

崇德三年八月丙申前鋒將領武拜等擊敗明兵于

紅山口

先是四月己未武拜率前鋒八十人往寧遠蹣踪
遇哨卒十人擒三人獲馬十匹而還至是復與
沙爾琥達率前鋒兵四十名蒙古兵四十名至紅

山口遇明千總二員兵百人擊斬兩千總獲馬二
又敗羅文峪兵五百騎獲馬四十一大纛二又敗
密雲步兵一百二十人並八隊邏卒盡殲之

戊申授舉人生員官階並優免丁役

賜中式舉人羅碩常爾瑚球阿際格弼里克圖王文奎蘇
宏祖楊方興曹京張大任于變龍等十名朝衣各
一領授牛录章京品級各免四丁一等生員鄂謨
克圖滿闡等十五名二等生員鏗特碩岱等二十

八名三等生員費齊溫泰等十八名各

賜紬布授護軍校品級已入部者免二丁未入部者免一

丁

癸丑

命睿親王多爾袞貝勒岳託統左右翼軍分道征明

太宗命睿親王多爾袞為奉命大將軍統左翼軍以貝勒

豪格饒餘貝勒阿巴泰副之貝勒岳託為揚武大

將軍統右翼軍以安平貝勒杜度副之分兩路征

明

名集出征諸王貝勒大臣等宣示軍律曰爾等臨陣若七旗敗走一旗拒戰者七旗所屬人員俱給拒戰之一旗一旗敗走而七旗拒戰者以敗走一旗所屬人員分給七旗如一旗內拒戰者半敗走者半即以敗走者所屬人員給本旗拒戰者屯駐他所者免罪若七旗未及整伍而一旗拒戰得功者按其功次大小俘獲多寡賞之野戰時本旗大臣率兵下馬立王貝勒等率護軍乘馬

立于後當進止以時如有越隊輕敵妄自衝突者奪所乘馬及俘獲人口兩軍相對必整齊隊伍各按汛地從容前進若擅離本隊隨別隊而行擅離本汛由他汛而入及衆軍已進而獨却立觀望者或處死或籍沒或鞭責或黜革或罰銀分別治罪如敵人不戰而遁我軍追之當用驍騎合力馳擊護軍統領止宜領纛整伍分隊以躡其後毋得前進倘追兵遇伏或另有敵兵旁出護軍統領乃親擊之凡大軍起營時務須整肅戎行若有

離隊往來尋索遺物及酗酒者俱貫耳喧譁者責懲下
營時凡採薪汲水務集衆同行失律者斬軍裝器械俱
書姓名馬匹繫牌印烙隱匿他人之箭者罰之盜鞍轡
者罪之馬上行裝應整理者本旗人俱立以待之整畢
乃行兵入敵境若有一二人私掠被殺者妻子入官仍
治本管章京之罪其以妄取糧草被殺者罪與私掠同
大軍所至勿毀寺廟勿殺平人抗者戮之順者養之俘
獲之人勿褫其衣服勿離其夫婦有不遵者依律治罪

宣畢

太宗又諭曰征伐非朕所樂聞也朕常欲和而明不從是以興師耳其不抗拒我兵者慎勿殺之不便攜歸者勿加擾害前武英郡王於丙子歲克明昌平州時所領官兵如漁人入水捕魚擒之以手挾之以脅又復銜之以口其時以貪取獲罪者甚多朕豈欲爾等犯法樂于加罪耶懲其既往正欲警其將來耳常閱古史云夏禹道遇罪人而泣侍臣曰此犯法有罪之人王何為而泣也

禹曰堯舜時政教德澤宣布于民故人無犯法令我之泣非為囚也我之政教德澤不如堯舜致有罪人故泣耳朕見爾等有罪亦甚為惻然爾等宜互相勉勵恪遵軍令以行毋或怠玩從事今蒙古漢人朝鮮諸國俱已歸附軍容壯盛爾等勿徒自逞勇力以威懾人蓋爾等為衆所觀瞻若能自處以禮濟之以和則歸附各國見我國疆而有德勇而有禮益加悅服矣凡為主帥者臨陣時當念國家付託之重使徒為一己立功而不念兵

之死傷軍之敗衄及國之聲名有損非主帥也至軍中
議事遇有意見乖謬者即宜面為勸諭毋得緘默不言
亦不得於當時故出微辭而事後托辭自解果明言於
衆而衆不從始可於還時申理其說也越四日丁巳揚
武大將軍貝勒岳託率右翼軍啓行

太宗親送之辰刻出撫近門謁

堂子拜轟行禮畢至演武場

賜岳託敕印岳託率衆行禮畢復

召至御前

親授方略

賜茶畢送里許由懷遠門還宮九月癸亥奉命大將軍睿親王多爾袞率左翼軍啟行

上親送之如前儀

己未授伊蘇特部降人博琿等世職

博琿錫訥布庫和尼齊阿巴泰巴圖魯巴特瑪塞稜托克托輝自伊蘇特部來歸授博琿錫訥布庫

和尼齊俱為三等梅勒章京阿巴泰巴圖魯巴特瑪塞稜托克托輝俱為三等甲喇章京

九月丁丑定優免人丁例

無世職管旗大臣承政准免十丁梅勒章京內大臣參政准免八丁甲喇章京一等侍衛理事官准免五丁牛录章京二等侍衛副理事官准免四丁三等侍衛准免三丁貝勒屬下三等護衛准免二

丁

冬十月丁酉貝勒岳託等奏報右翼軍入牆子嶺

揚武大將軍貝勒岳託等遣前鋒將領阿爾布尼
等賫疏奏報右翼軍於九月二十二日從明密雲
縣東北牆子嶺口拆毀邊牆前進明總督吳阿衡
率兵六千來援見我兵已入邊遂率數百人退入
堡內分步騎為三隊負嶺立寨俱為我軍所敗時
明副將一員率兵二千迎戰譚泰旗下德特碩爾
允杜類旗下魯克都瑚里布夾攻之獲馬百駝二

十又明守備一員率兵千餘迎戰貝勒杜度督漢
軍侍衛李國翰王延祚及恭順王孔有德懷順王
耿仲明所屬曹得賢賈世魁常得芳等擊敗之獲
馬三十九又喀喇沁部萬丹索諾木擊敗明兵一
隊獲馬十三前鋒將領勞薩錫特庫等追擊潰兵
獲馬八十大小礮位二十五擒哨卒問之知牆子
嶺堅不易拔惟嶺東西兩旁高處可以越入於是
分我軍為四路令護軍統領圖賴率右翼每牛录

護軍一名及喀喇沁部下每旗護軍甲喇章京一員從嶺之右側步越高峯恐圖賴兵少復令貝子芬古及葉臣兩旗護軍騎兵助之未至而圖賴兵

已先入攻克十一臺令阿岱恩格圖兩旗固穆

郭爾

羅斯部長

一旗俱離嶺五里自高山入而恩格圖兵先

之譚秦都雷兩旗護軍騎兵令距阿岱等十五里於高峰無邊牆處齊入令巴特瑪率本旗兵會同喀喇沁巴林教漢奈曼烏喇特阿魯科爾沁諸部

兵漢軍並孔有德耿仲明屬下兵俱從邊城東小門平坦處舉火礮豎雲梯攻之時明兵俱于邊界平坦處拒守巴林阿玉什部下索爾古先登諸軍遂相繼攻入又軍中獲海龍城邏卒一名訊係明守備遣來議貿易價值者縱之使歸且令傳諭海龍守備曰前聞爾邊城云有邏卒十八名為我軍所殺又殺爾關上貿易良民此豈我軍識其人而殺之耶且長城邊內屬爾明國邊外乃我

大清國之地因入我地而殺之耳前緣爾等貿易相好故進邊時不加擾害直入昌平今又避爾地從牆子嶺入豈以爾關險阻而不入耶以此思之相好如初乃爾之幸倘爾等稍懷變志禍難釋矣

戊戌睿親王多爾袞等奏報左翼軍入青山關

奉命大將軍睿親王多爾袞等奏報左翼軍於九月二十八日自董家口東二十里青山關西二里許步登山岡由邊牆缺處率兵前進青山關嶺峻

牆堅問之土人云關內有明兵二百防守聞我右翼
軍至已于二十五日往援我軍乘其無備毀牆而
入莫敢撓鋒青山關董家口青山營三處人民棄
城逃走執其人問之云青山關東二十里榆木嶺
口有步兵二百與董家口兵亦以我右翼軍至同
往救援是以缺兵防守又問流賊消息云在河南
等處肆掠今年大水禾稼半收祖大壽及其兵馬
已調往西去又明人自山海關遣哨卒五名馬八

匹來探我右翼軍踪跡回至蘇布地杜稜城為我
軍所獲問其人云山海關九門今歲被水衝壞止
餘一門我軍出征的信彼于十九日由山海關報
至三屯營陳總兵遣八人往喀喇托果迎探與我
前鋒兵夜遇于蘇布地杜稜城生擒六人獲馬七
匹問知我右翼軍于二十四五等日進邊山海關
高太監已調入關內矣是日朝鮮國王李倬以違
悞軍期遣陪臣領議政崔鳴吉賫咨赴部請罪部

臣以

聞

太宗遣承政英國爾岱滿達爾漢傳

諭曰朝鮮國王向來傾心歸服朕既以非常之恩禮待王
王亦應以非常之忠順報朕不意負恩至此試思爾國
兵即不來曷嘗沮朕證明之役但自古以來如爾歸降
之人違悞軍期或問重罪革王爵者有之或從輕罰鍰
者有之朕既格外施恩必不降爾王爵姑俟證明之諸

王貝勒回時降旨議罪此時罪之輕重尚未可預定也

己酉

太宗親統大軍征明分三路繼進

先是九月壬申

太宗諭諸王大臣等曰明人聞我二路進兵則山海關以東寧遠錦州兵必往西援朕將率鄭親王濟爾哈朗及貝子大臣等親統大軍前進山海關一帶牽制其援兵豫親王多鐸亦令同行其前罪姑俟班師時議之

前以送左

翼軍啟行不至禁之不得出
府門至四年五月降為貝勒
並降

敕徵恭順王孔有德懷順王耿仲明智順王尚可喜兵令

各攜紅衣礮及一切火器戰車齎兩月糧至

盛京啟行丁亥

太宗出懷遠門至演武場

閱視漢軍大臣石廷柱馬光遠兩旗兵令試礮較射角觝

畢

賜宴冬十月丁酉

金史卷之三十六
卷二十六
命石廷柱馬光遠運礮位火器等具先行己亥

太宗率鄭親王濟爾哈朗豫親王多鐸等統大軍向山海

闕進發辛丑次彰武臺口

諭從征王貝子及諸大臣等曰凡我大軍全師征討駐營時每旗一營立五門若兵半出則立三門其往來牧馬運取薪水之人俱由營門出入不許擅入軍帳任意穿走恐有逃亡盜竊不軌之人難以稽察又領旗王貝勒以下及一切人等或係奉召而來或至御營奏事進外

營則從南門入進內營則從東西門入如從他門及無門處擅入者從重治罪甲辰大軍至渾河科爾沁部土謝圖親王巴達哩卓哩克圖親王武克善扎薩克圖郡王布塔齊巴圖魯郡王滿珠什哩等率十旗兵來會喀喇沁部落古魯斯希布杜稜率四旗兵來會各獻駝馬酌納之丙午駐軍哈喇蘇遣前鋒將領沙爾琥達等率前鋒五十人往明義州一帶捉生擒八人還已酉

車駕至托袞博倫行獵

命鄭親王濟爾哈朗貝子碩託各率本旗護軍及喀喇沁
兵從前屯衛寧遠中間進發豫親王多鐸貝子博
洛各率本旗護軍及土默特兵從寧遠錦州中間
進發

太宗親統大軍從義州一路進發辛丑次教穆掄

命索海率每旗甲喇章京一員兵二十名及前鋒全軍往
圍大凌河兩岸十四屯堡捉生壬子入明邊駐軍

義州是夕集衆

諭令軍中馬匹刈草於營內飼之不許放馬營外夜間鳴
金巡警毋或稍怠癸丑渡大凌河至戚家堡

命孔有德耿仲明尚可喜及石廷柱馬光遠等以神威將
軍礮攻克五臺乙卯大軍至錦州南遣使

諭屏城藩城開城守臣曰爾等三城每城止留官一員兵
二十名駐守其餘將士俱至遼陽沃赫渡口會師欲將
俘獲人口牲畜交與爾等攜回丙辰豫親王多鐸等自

軍中遣扎塔奏報臣等未入邊時先遣鄂羅塞臣
往邊外擊明哨卒殺三人生擒一人本日又遣扎
珠古往擊哨卒生擒二人又遣翁克喀爾塔喇往
截道路生擒六人聞邊外有駐牧蒙古是夜遣扎
珠古往探竟無踪跡遇車五輛獲人一名牛五頭
夜入邊時先遣塞赫岳多惠前行于邊外遇燒炭
人訊之云桑阿爾齋舊居之大興堡為移營蒙古
所據毫無防備於是往收其堡外牲畜次豎梯攻

入有守備一員男子二百俱戮之獲婦女幼丁共七十馬十二牛四百驢二十九羊三百六十七是日明總兵祖大壽遣二人執令箭赴錦州豫親王多鐸生擒之並其甲冑橐韃來獻丁巳孔有德等以礮攻戚家堡石家堡克之俘獲人口三百一十七牲畜百四十有奇次日

命孔有德等俟大軍移營後以礮攻錦州城西臺方欲進攻臺內礮藥自發臺壞克之

十一月庚午自中後所班師

大軍至錦州南之次日

太宗以鄭親王濟爾哈朗兵力寡

命豫親王多鐸率本部兵往中後所助之十一月癸未朔
多鐸軍將過中後所會明總兵祖大壽往援北京
以兵來襲多鐸軍後土默特部鄂木布楚琥爾及
甲喇章京翁克等率衆先退前鋒將領哈寧阿等
不能敵且戰且退貝子博洛向前迎擊始却之多

鐸收軍不戰夜至濟爾哈朗營濟爾哈朗聞之怒
次日同多鐸率兵至中後所大壽兵懼不敢出乃
還營是日石廷柱馬光遠等攻克李雲屯柏士屯
郭家屯開州井家堡俘獲人口七百有二馬羸四
十有六牛二百有十驢百三十有七羊百十有六
孔有德等招降大福堡又攻克一臺獲蒙古漢人
男婦三百七十有九牲畜稱是即以

賜孔有德等辛酉大軍入山海關壬戌至連山丁卯

太宗統兵至中後所見祖大壽收兵入城遣人賫

敕諭之曰自大凌河別後今已數載朕不憚辛苦而來甚
思將軍出城一見至于去留終不相強若曩則釋之令
乃誘而致之何以示信于天下乎將軍與我角勝為將
之道應爾朕決不以此介意將軍亦勿以此自疑也豫
親王多鐸遣阿爾津穆福扎塔奏言距中後所四
十里山岡與祖大壽兵遇兩相誘戰殺敵三十名
次日再遣人

諭大壽皆不答己巳鄭親王濟爾哈朗奏克模龍闕及五里堡屯臺俘其人口牲畜庚午自中後所班師出明邊至六洲河庚辰至圖爾根河遣外藩蒙古各歸部漢軍由平路行

太宗行獵至奇爾哈納丙戌

車駕自撫近門還宮

十二月己丑朔

賜朝貢諸外藩宴

時厄魯特部尹扎胡圖克圖下額爾格布什格隆
宰桑等十七人土默特部武巴什巴彥蒙庫等四
十七人蘇尼特部騰機思下巴克察爾塔布囊等
十五人鄂爾多斯部濟農下武巴什等十二人烏
珠穆沁部多爾濟濟農下奇塔特塔布囊等三人
均以貢駝馬朝見次日黑龍江薩哈連

額駙巴爾
巴齊之弟

瑚爾布爾屯費揚古沃呼屯武第堪烏魯蘇屯莽
古珠等五十一人索倫部博木博果爾透特等九

人呼什哈禮氏納木達哩等十人巴雅喇氏滿第
特喀下二人布克圖禮等五人賴達庫等四人均
以貢貂朝見

太宗御崇政殿賜宴

命七家以次宴之

賜綵緞銀兩衣服鞍馬等物有差

癸丑編新降漢人戶口

先是恭順王孔有德等以礮攻五里河臺壞其兩

角臺上人懼守備李計友李惟觀率衆降皆編為民戶至是復

賜陣獲守備蘭某百總韓自明貉裘帽鞞等物其攜來漢人編入戶口共為五十一屯各

賜布疋等物

崇德四年春正月己卯封沈志祥為續順公

庚午

太宗御崇政殿

賜新附總兵官沈志祥宴越十日封志祥為續順公給與
誥命及印

賜紅寶石嵌兩東珠金頂貂帽金鑲圓片玉帶鞍馬等物
後叙其屬下有功官員沈永忠許天寵等二十八

人各授世職

見十月
癸丑

壬寅

太宗親征明松山

丁酉

命武英郡王阿濟格輔國公碩託等率將士征明先期遣
漢軍大臣石廷柱馬光遠率兩旗兵預運礮位前
行越四日

太宗親統大軍出懷遠門西發丙午武英郡王阿濟格等
遣納海奏報前至大凌河東四里屯張剛屯寶林
寺旺民屯于家屯成化峪道爾彰等七屯揚言用
紅衣礮攻擊臺上人畏懼俱已歸順并籍俘獲人
口牲畜銀兩數目以

聞

太宗命調屏城藩城開城守臣率本處兵護送俘獲人口
還是日奈曼部達爾漢郡王袞楚克巴圖魯烏喇
特部圖巴鄂班巴克巴海扎魯特部桑噶爾內齊
穆彰四子部伊爾扎穆巴林部滿珠什哩翁牛特
部達爾漢岱青宰桑武巴什等率十三旗來會於
翁啟爾琿庚戌大軍至松山

命恭順王孔有德等以紅衣礮擊松山城東隅山臺臺上

藥發守臺弁兵俱被焚其路旁二臺俱招降之漢
軍左翼石廷柱以駁擊松山南樓臺毀其堞臺兵
不能禦守臺官王昌功率四十五人降右翼馬光
遠以礮攻松山西南角臺守臺官楊文顯率十一
人降壬子

太宗登松山南岡相度城垣形勢指示孔有德等曰城南
門中間以孔有德兵右面以耿仲明兵左面以尚可喜
兵俱用神威將軍礮攻之左右兩處馬光遠石廷柱各

以紅衣礮協攻又兩旗漢軍各移紅衣礮二位攻取城西南隅臺破臺後仍移回各分汛地二十五日四鼓移礮前進五鼓攻擊俟城堞已壞滿洲兵可豎梯登城癸丑孔有德等各遵

旨於四鼓移礮前進五鼓攻擊松山兵出城迎戰為我軍射退入城於是用礮攻至未時城堞盡毀城垣猶存明副將金國鳳死守用草木填其頽處以為捍蔽

命諸將豎梯攻城諸將俱踴躍爭先禮親王代善以日暮請俟明日再攻

太宗從其言

召諸將還諸將及孔有德等皆謂宜急攻取而是夜松山城
中於城南攻毀處潛以繩繫木覆之以土比明
堵築已固我軍豎梯將登其城堞毀處捍蔽甚堅
不能入親軍真特先登陷于陣

太宗集諸將復議攻城之策皆謂必能攻克但礮子火藥

已用大半宜遣人速取於是遣官八員率兵回
盛京運取礮子火藥

命武英郡王阿濟格貝子尼堪洛託等率四旗護軍還守
塔山連山孔有德等奏請穴地攻松山城從之

三月庚辰敗明援兵於錦州釋松山圍

是月戊午朔明太監高起潛總兵祖大壽自寧遠
遣官三員率兵九百名船十隻由水路來援杏山
我前鋒兵遇其後隊擊殺五十人獲船一甲四十

乙丑復

命納海瑚密色索琿等馳略杏山獲牛羊四百石廷柱馬
光遠等以礮攻觀民山臺降其男婦十八人丁卯

敕諭杏山松山官民曰爾等審時度勢危亡之禍豈不知
之所冀幸者我師之不久即退耳若不速來歸命大軍
久駐悞爾農時絕爾糧運縱今歲或可苟延明歲決無
生理彼時外援不至城中食盡雖悔無益也已已移營
松山岡一里許駐軍再以

敕諭松山城中官員壬申

盛京運礮子火藥至以紅衣礮移近松山城攻之丁

丑

太宗召大學士范文程希福剛林等

諭之曰朕夜夢

皇考聖顏不懌向遇此等夢兆攻取城邑皆不能得今雖

攻松山亦必難得爾等試驗之己卯鰲拜丹岱等率護

軍沿錦州城馳略殺二十人獲牲畜百八十有奇

還時布延塔布囊率每旗親軍護軍十人阿爾薩
蘭率滿洲兵四十名教漢奈曼扎魯特等部兵一
百二十名先後駐守錦州西北界邊外烏欣口高
起潛祖大壽於丁丑日揀選蒙古漢兵各三百名
令松山副將楊震祖克勇錦州副將徐昌永杏山
游擊李得維領之從邊外趨錦州庚辰黎明經烏
欣口阿爾薩蘭等擊敗之生擒楊震及二人殺八
十四人獲馬一百五十遣人奏捷

太宗親率四旗護軍馳往錦州縱兵攻其山寨敗之沿山搜剿復分兵剿殺兩夜其逃入臺者以紅衣礮攻之陣斬徐昌永生擒祖克勇及守備一員共殲明兵三百十一名獲馬四百有奇以所獲馬匹分

賞四旗護軍並

賜將領以下馬各一我兵時分三路穴松山城有錦州蒙古兵三百來援乘夜入城我軍不能復攻遂罷攻城之議令孔有德石廷柱等各率所部兵還

盛京

車駕自松山還至錦州西北駐營仍遣四旗騎兵往助武
英郡王阿濟格駐守塔山阿濟格尋率滿洲四旗
及蒙古四旗往略連山獲人口馬匹共千計還至
義州南山岡會於

御營

皇清開國方略卷二十六